

**ZAKON
O STAVLJANJU U PROMET PREDMETA
OD DRAGOCJENIH METALA BRČKO DISTRIKTA BiH**

Na osnovu člana 23 Statuta Brčko distrikta BiH («Službeni glasnik Brčko distrikta BiH» brojevi 1/00, 4/00, 7/04, 20/05 i 24/05), Skupština Brčko distrikta BiH na 25. sjednici, održanoj 25. januara 2006. godine, usvaja:

ZAKON O STAVLJANJU U PROMET PREDMETA OD DRAGOCJENIH METALA BRČKO DISTRIKTA BIH

DIO PRVI - OPĆE ODREDBE

Član 1 (Predmet zakona)

Ovim zakonom propisuju se tehnički zahtjevi, postupak i nadzor nad stavljanjem u promet predmeta od dragocjenih metala na području Brčko distrikta BiH.

Član 2 (Uslovi za stavljanje u promet)

Predmeti od dragocjenih metala u Brčko distriktu BiH mogu se stavljati u promet, odnosno držati radi stavljanja u promet ili držati izloženi kao uzorci samo ako imaju oznaku finoće, oznaku proizvođača, oznaku uvoznika odnosno izvoznika i žig nadležne institucije.

Član 3 (Definicije)

Definicije koje se koriste u ovom zakonu imaju slijedeće značenje:

- a) dragocjeni metali su zlato, platina, srebro i paladij;
- b) legura plemenitih metala je čvrsta homogena smjesa plemenitog metala i jednog ili više drugih metala;
- c) predmeti od dragocjenih metala su predmeti izrađeni od zlata, platine, srebra, paladija i njihovih legura, koji prema odredbama ovog zakona imaju propisan stepen finoće;
- d) mali predmeti od dragocjenih metala su predmeti izrađeni od zlata ili platine mase manje od 1 gr ili predmeti izrađeni od srebra ili paladija mase manje od 3 gr;
- e) stepen finoće je najniži sadržaj mase čistog dragocjenog metala, izražen u hiljaditim dijelovima, u odnosu na ukupnu masu legure (H/1000);
- f) oznaka finoće je oznaka koja definiše stepen finoće predmeta od dragocjenog metala i ima propisan sadržaj, oblik i dimenzije;
- g) verifikovanje predmeta od dragocjenih metala je potvrđivanje usaglašenosti ispitnog predmeta, u pogledu sastava, finoće i oznaka, sa odredbama ovog zakona, žigom za označavanje stepena finoće predmeta od dragocjenog metala (u daljnjem tekstu: žig nadležne institucije);
- h) znak proizvođača, odnosno znak uvoznika predmeta od dragocjenog metala je znak odobren od republičke institucije za metrologiju u Republici Srpskoj i

Zavoda za mjerilaštvo u Federaciji BiH (u daljnjem tekstu: nadležne institucije), propisanog sadržaja, oblika i dimenzija kojim proizvođač, odnosno uvoznik označava predmete od dragocjenih metala;

- i) ispitivanje predmeta od dragocjenih metala je niz postupaka koje obavezno čine: identifikacija predmeta od dragocjenog metala, vizuelni pregled stanja i propisanih oznaka na njemu i određivanje hemijskog sastava i stepena finoće propisanim metodama i opremom za ispitivanje;
- j) označavanje predmeta od dragocjenih metala je utiskivanje odobrenog znaka proizvođača i pripadajuće oznake finoće, odnosno za uvezene predmete od dragocjenog metala, utiskivanje samo odobrenog znaka uvoznika;
- k) proizvođači predmeta od dragocjenih metala su sva pravna lica ili samostalni preduzetnici, registrovani kod nadležnog organa za obavljanje djelatnosti proizvodnje predmeta od dragocjenih metala;
- l) uvoznici predmeta od dragocjenih metala su sva pravna lica ili samostalni preduzetnici registrovani kod nadležnog organa za obavljanje djelatnosti uvoza, kao i zastupanja stranih proizvođača predmeta od dragocjenih metala.

Član 4

(Predmeti koji nisu obuhvaćeni odredbama ovog zakona)

Odredbama ovog zakona ne podliježu:

- a) kovani novac od dragocjenih metala i njihovih legura koji služi kao zakonsko sredstvo plaćanja;
- b) predmeti od dragocjenih metala starije proizvodnje koji imaju naučnu, historijsku, kulturnu i umjetničku vrijednost;
- c) instrumenti, aparati i njihovi dijelovi od dragocjenih metala koji se koriste u nauci, zdravlju, proizvodnji i laboratorijskim ispitivanjima;
- d) predmeti od dragocjenih metala koji su u potpunosti presvućeni emajlom, dragim kamenom, biserom ili sličnim predmetima;
- e) držači (okovi) na dragom kamenu, biseru ili drugom predmetu kod kojih je masa dragocjenog metala prema ukupnoj masi predmeta neznatna;
- f) poluproizvodi od dragocjenih metala i njihovih legura koji se upotrebljavaju u industriji;
- g) legure za lemljene na bazi srebra, platine ili paladija;
- h) predmeti od dragocjenih metala ili njihovih legura koji su vlasništvo pojedinca.

DIO DRUGI – POSTUPAK STAVLJANJA U PROMET I KONTROLA PREDMETA OD DRAGOCJENIH METALA

GLAVA I - TEHNIČKI ZAHTJEVI

Član 5 (Stepeni finoće)

Predmeti od dragocjenih metala moraju imati slijedeći stepen finoće:

- a) predmeti od zlata:
 - 999 hiljaditih (999/1000)
 - 950 hiljaditih (950/1000)
 - 916 hiljaditih (916/1000)
 - 840 hiljaditih (840/1000)

750 hiljaditih (750/1000)
585 hiljaditih (585/1000)
500 hiljaditih (500/1000)

b) predmeti od platine:
999 hiljaditih (999/1000)
950 hiljaditih (950/1000)

c) predmeti od srebra:
999 hiljaditih (999/1000)
950 hiljaditih (950/1000)
925 hiljaditih (925/1000)
800 hiljaditih (800/1000)

d) predmeti od paladija:
999 hiljaditih (999/1000)
950 hiljaditih (950/1000)
500 hiljaditih (500/1000)

Član 6

(Predmeti koji se ne smatraju predmetima od dragocjenih metala)

Predmeti od zlata koji imaju stepen finoće niži od 500 hiljaditih (500/1000), predmeti od platine koji imaju stepen finoće niži od 950 hiljaditih (950/1000), predmeti od srebra koji imaju stepen finoće niži od 800 hiljaditih (800/1000) i predmeti od paladija koji imaju stepen finoće niži od 500 hiljaditih (500/1000), ne smatraju se, u smislu ovog zakona, predmetima od dragocjenih metala.

Član 7

(Stepen niže finoće)

Predmeti od dragocjenih metala koji imaju stepen finoće veći od propisanog članom 5 ovog zakona, a manji od sljedećeg višeg stepena, imaju finoću nižeg stepena.

Član 8

(Predmeti presvučeni drugim dragocjenim metalom)

Predmet od dragocjenog metala presvučen drugim dragocjenim metalom smatra se predmetom od dragocjenog metala od kojeg je predmet izrađen.

Član 9

(Predmeti za daljnju preradu)

(1) Predmeti od dragocjenih metala koji su izrađeni od zlata, srebra, platine i paladija i imaju stepen finoće 999/1000 mogu se staviti u promet samo radi daljnje prerade.

(2) Na predmete iz stava 1 ovog člana utiskuje se oznaka 999.

GLAVA II - OZNAČAVANJE PREDMETA OD DRAGOCJENIH METALA

Član 10 (Oznake predmeta od dragocjenih metala)

(1) Proizvođač predmeta od dragocjenih metala mora izrađeni predmet označiti samo svojim odobrenim znakom proizvođača i pripadajućom oznakom finoće, utvrđenom od strane nadležne institucije.

(2) Uvoznik predmeta od dragocjenog metala mora uvezeni predmet označiti samo svojim odobrenim znakom uvoznika.

(3) Odredbe stavova 1 i 2 ovog člana ne odnose se na predmete od dragocjenog metala mase manje od 1 grama i na predmete od dragocjenog metala navedene u članu 4 ovog zakona.

Član 11 (Znak uvoznika i proizvođača)

Znak proizvođača, odnosno znak uvoznika predmeta od dragocjenih metala i oznaka finoće ne smiju biti manji od 0,5 mm i moraju se trajno i neizbrisivo utisnuti u predmet od dragocjenog metala.

Član 12 (Rješenje o znaku proizvođača ili uvoznika)

Znak proizvođača, odnosno znak uvoznika određuje se rješenjem o znaku proizvođača, odnosno uvoznika, koje donosi direktor nadležne institucije, a na zahtjev proizvođača, odnosno uvoznika predmeta od dragocjenih metala.

GLAVA III - VERIFIKACIJA PREDMETA OD DRAGOCJENIH METALA

Član 13 (Verifikacija predmeta od dragocjenih metala)

(1) Predmeti od dragocjenih metala, prije stavljanja u promet, podliježu obaveznoj verifikaciji, od strane nadležne institucije, odnosno njenih organizacionih jedinica.

(2) Verifikacijom predmeta od dragocjenih metala utvrđuje se i garantuje njihov hemijski sastav i stepen finoće.

Član 14 (Zahtjev vlasnika predmeta)

Predmeti od dragocjenih metala u vlasništvu pojedinca verifikuju se samo na zahtjev vlasnika tih predmeta.

Član 15
(Dorada ili prerada predmeta)

Ako se verifikovan predmet od dragocjenog metala doradi ili preradi, mora se prije stavljanja u promet ponovo izvršiti verifikacija.

Član 16
(Zabrana prenošenja žiga)

Zabranjeno je prenošenje utisnutog žiga nadležne institucije na drugi predmet od dragocjenog metala.

Član 17
(Troškovi verifikacije predmeta)

Troškove verifikovanja predmeta od dragocjenih metala snosi podnosilac zahtjeva za verifikovanje (proizvođač, uvoznik ili vlasnik predmeta od dragocjenog metala).

GLAVA IV - STAVLJANJE U PROMET

Član 18
(Uslovi za stavljanje u promet predmeta od dragocjenih metala)

Predmeti od dragocjenih metala mogu se stavljati u promet ili držati pripremljeni radi stavljanja u promet ili biti izloženi kao uzorci, samo ako su označeni znakom proizvođača, odnosno uvoznika, imaju stepen finoće koji odgovara zahtjevima propisanim ovim zakonom i ako su na propisan način verifikovani.

Član 19
(Uslovi koje moraju ispunjavati uvezeni predmeti)

(1) Uvezeni predmeti od dragocjenih metala u Brčko distriktu BiH, moraju imati oznaku finoće, a prije stavljanja u promet moraju biti označeni znakom uvoznika i žigom nadležne institucije.

(2) Predmete iz stava 1 ovog člana zabranjeno je obilježavati odobrenim znakom proizvođača sa sjedištem izvan Brčko distrikta BiH.

Član 20
(Uslovi koje moraju ispunjavati predmeti namijenjeni za izvoz)

(1) Predmeti od dragocjenih metala namijenjeni izvozu, moraju biti označeni samo oznakom finoće.

(2) Predmeti iz stava 1 ovog člana označit će se znakom proizvođača i verifikovati, samo ako to zahtijeva izvoznik ili strani kupac.

(3) Troškove iz stava 2 ovog člana snosi izvoznik ili strani kupac, odnosno podnosilac zahtjeva.

Član 21
(Odvojeno držanje predmeta od dragocjenih metala)

Predmeti iz članova 4 i 6 ovog zakona moraju se u prodajnim prostorijama držati odvojeno od predmeta od dragocjenih metala.

Član 22
(Obaveza isticanja žiga nadležne institucije, odnosno rješenja)

(1) U prodajnim prostorijama pravnih lica ili samostalnih preduzetnika, registrovanih kod nadležnog organa za obavljanje djelatnosti prometa predmetima od dragocjenih metala, na vidnom mjestu moraju biti istaknute slike žiga nadležne institucije i pregled oznaka finoće iz člana 5 ovog zakona.

(2) Sredstva kojima se oznake na predmetima od dragocjenih metala mogu raspoznati, odnosno utvrditi (lupe i dr.), također moraju biti u prodajnim prostorijama i moraju se na zahtjev zainteresovanih lica staviti na raspolaganje.

(3) U svojim prodajnim prostorijama proizvođači i uvoznici predmeta od dragocjenih metala moraju na vidnom mjestu držati i rješenje o znaku proizvođača, odnosno rješenje o znaku uvoznika.

GLAVA V - NADZOR I UPRAVNE MJERE

Član 23
(Nadzor)

(1) Nadzor nad predmetima od dragocjenih metala, prije stavljanja u promet, vrše nadležne institucije.

(2) Nadzor nad predmetima od dragocjenih metala stavljenim u promet, vrši tržišna inspekcija Brčko distrikta BiH.

Član 24
(Obaveze proizvođača i uvoznika)

(1) Tržišna inspekcija pri obavljanju nadzora iz člana 23 ovog zakona ima pravo ulaziti u prostorije u kojima se predmeti od dragocjenih metala proizvode, stavljaju u promet ili drže pripremljeni radi stavljanja u promet.

(2) Proizvođači i uvoznici predmeta od dragocjenih metala moraju omogućiti ovlaštenim licima nesmetano obavljanje nadzora i dati na uvid sve potrebne podatke.

Član 25
(Nadležnost inspekcije)

(1) Ako pri obavljanju nadzora, tržišna inspekcija utvrdi da je rješenje ukinuto ili da je istekao rok važenja rješenju, donijet će rješenje o zabrani stavljanja u promet predmeta od dragocjenih metala ili rješenje o oduzimanju predmeta od dragocjenih metala.

(2) Ako pri obavljanju nadzora, tržišna inspekcija utvrdi da predmeti od dragocjenih metala nisu propisno verifikovani, donijet će rješenje o zabrani stavljanja u promet tih

predmeta ili rješenje o privremenom oduzimanju predmeta.

(3) Jedan primjerak rješenja iz stavova 1 i 2 ovog člana dostavlja se nadležnoj instituciji.

(4) Predmeti od dragocjenih metala za koja je doneseno rješenje iz stava 2 ovog člana, ne smiju se staviti u promet prije ponovnog verifikovanja.

(5) Žalba protiv rješenja iz stavova 1 i 2 ovog člana, ne odlaže izvršenje rješenja.

GLAVA VI - KAZNE NE ODREDBE

Član 26 (Prekršaji)

(1) Novčanom kaznom od 1.000 KM do 10.000 KM kaznit će se za prekršaj pravno lice:

- a) ako stavi u promet ili drži pripremljene radi stavljanja u promet ili drži izložene kao uzorke predmete od dragocjenih metala koji ne ispunjavaju uslove u pogledu sastava i stepena finoće ili koji nisu na propisani način označeni i verifikovani (član 18);
- b) ako upotrebljava znak proizvođača, odnosno znak uvoznika kojem je ukinuto rješenje o znaku proizvođača, odnosno uvoznika ili je istekao rok važenja rješenja ili predmeti nisu propisno verifikovani (član 25 stavovi 1 i 2);
- c) ako prenese utisnuti republički žig na drugi predmet od dragocjenog metala (član 16);
- d) ako stavi u promet predmete od dragocjenih metala za koja je doneseno rješenje o zabrani stavljanja u promet (član 25 stavovi 1 i 2).

(2) Za prekršaj iz stava 1 ovog člana novčanom kaznom od 500 KM do 2.000 KM kaznit će se i odgovorno lice u pravnom licu.

(3) Za prekršaj iz stava 1 ovog člana novčanom kaznom od 100 KM do 1.000 KM kaznit će se samostalni preduzetnik.

Član 27 (Prekršaji)

(1) Novčanom kaznom od 1.000 KM do 5.000 KM kaznit će se za prekršaj pravno lice:

- a) ako prije stavljanja u promet ne podnese na ponovno verifikovanje predmete od dragocjenih metala koji su dorađeni ili prerađeni (član 15);
- b) ako u prodajnim prostorijama predmete od dragocjenih metala ne drži odvojeno od ostalih predmeta (član 21);
- c) ako u prodajnim prostorijama ne stavi na vidno mjesto slike republičkih žigova i oznaka finoće predmeta od dragocjenih metala i ne stavi na raspolaganje sredstva kojima se te oznake mogu raspoznati (član 22 stavovi 1 i 2);
- d) ako u svojim prodajnim prostorijama na vidnom mjestu ne drži rješenje o znaku proizvođača, odnosno uvoznika (član 22 stav 3) i
- e) ako ne dozvoli ili ometa obavljanje nadzora (član 24 stav 2).

(2) Za prekršaje iz stava 1 ovog člana, kaznom od 200 KM do 500 KM kaznit će se i odgovorno lice u pravnom licu.

(3) Za prekršaj iz stava 1 ovog člana novčanom kaznom od 100 KM do 1.000 KM kaznit će se i samostalni preduzetnik.

(4) Pravnom licu i samostalnom preduzetniku, za prekršaje iz članova 26 i 27 ovog zakona može se izreći i zaštitna mjera trajnog oduzimanja predmeta koji su upotrijebljeni za izvršenje prekršaja, a pored toga može im se izreći i zaštitna mjera zabrane obavljanja djelatnosti u trajanju do šest mjeseci za prvi prekršaj.

DIO TREĆI - PRIJELAZNE I ZAVRŠNE ODREDBE

Član 28 (Prijelazne odredbe)

(1) Predmeti od dragocjenih metala koji su verifikovani do dana stupanja na snagu ovog zakona, ne podliježu ponovnom verifikovanju.

(2) Sva rješenja donesena prije stupanja na snagu ovog zakona ostaju na snazi do isteka roka važenja.

Član 29 (Zakoni koji prestaju da važe)

Stupanjem na snagu ovog zakona prestaje primjena Zakona o kontroli predmeta od dragocjenih metala ("Službeni glasnik Republike Srpske", broj 36/99) i Zakona o kontroli predmeta od dragocjenih metala («Službene novine Federacije BiH» br. 2/92, 3/93, 13/94), na teritoriji Brčko distrikta BiH.

Član 30 (Stupanje na snagu)

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta BiH".

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-3/06
Brčko, 25. januar 2006. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić